

Fundur með ráðherra um Náttúruminjasafn

Þrjú stjórnarmenn HÍN, þeir Árni Hjartarson formaður, Hilmar J. Malmquist ritari og Jóhann Þórsson félagsvörður, sóttu heim Katrínu Jakobsdóttur mennta- og menningarmálaráðherra í október á síðasta ári og ræddu við hana og starfslið ráðuneytisins um málefni Náttúruminjasafns Íslands.

Tilgangur fundarins af hálfu HÍN var að koma á framfæri áratuga löngu stefnumiði félagsins um byggingu Náttúruminjasafns Íslands á höfuðborgarsvæðinu, helst í miðborg Reykjavíkur sem næst öðrum höfuðsöfnum þjóðarinnar. Meðal annars var minnst á lóðina góðu í Vatnsmýri nærri Öskju, náttúrufræðahúsi Háskóla Íslands, sem á 100 ára afmæli HÍN árið 1989 var úthlutað fyrir náttúrugripasafn. Enn stendur í skipulagsskjölum að þarna skuli rísa slíkt safn.

Stjórn HÍN telur að fundurinn með ráðherra hafi farið vel fram og lofi góðu um farsæla framtíðarlausn þessa brýna þjóðþrifamáls.

Til hamingju Náttúrufræðistofnun!

Pau merku tímamót urðu 17. desember 2010 að nýtt húsnæði Náttúrufræðistofnunar Íslands, afsprengi Hins íslenska náttúrufræðifélags, var formlega tekið í notkun að Urriðaholtsstræti 6–8 í Garðabæ. Húsið er allt hið glæsilegasta og bætir mjög aðstöðu til rannsókna, fræðslu og varðveislu gripa. Ekki síst skiptir miklu máli að umfangsmikil og verðmæt gripasöfn stofnunarinnar komast loks í viðunandi húsnæði.

Stjórn HÍN óskar starfsfólki Náttúrufræðistofnunar, umhverfisráðuneytinu og landsmönnum öllum til hamingju með þennan þýðingarmikla áfanga.

Hið íslenska náttúrufræðifélag
Afgreiðsla: Náttúrufræðistofa Kópavogs - Hamraborg 6a, IS-200 Kópavogur
Sími: 570 0430
Netfang: hin@hin.is
Heimasíða: www.hin.is
Ábm. og ritstj. félagsbréfs: Hilmar J. Malmquist



Félagsbréf

1. tölublað

Febrúar 2011

36. árgangur

Aðalfundur HÍN!

Boðað er til aðalfundar Hins íslenska náttúrufræðifélags laugardaginn 26. febrúar 2011 kl. 14:00 í Kórnum, fundarsal Náttúrufræðistofu Kópavogs, Hamraborg 6a, Kópavogi.

Dagskrá fundarins er eftirfarandi:

1. Fundarsetning.
2. Skýrsla stjórnar HÍN fyrir árið 2010.
3. Reikningar HÍN fyrir árið 2010.
4. Skýrslur fulltrúa HÍN í opinberum nefndum fyrir árið 2010.
5. Tillögur til ályktunar.
6. Kjör stjórnarmanna og embættismanna félagsins.
7. Önnur mál.
8. Fundarslit.

Kaffiveitingar verða í boði.

Allir eru velkomnir!

HÍN á Fésbók – vertu vinur!

Hið íslenska náttúrufræðifélag hefur stofnað síðu á samskiptavef Fésbókar (sláið inn „hið“ í leitarlá og þá birtist síða félagsins). Nú er um að gera að staðfesta vinskap við félagið og hvetja aðra til að tengjast félaginu vinaböndum. Á síðunni munu m.a. birtast tilkynningar um fræðsluerindi og útgáfu Náttúrufræðingsins.

Náttúrufræðingurinn og opinber áskrift

Á aðalfundi HÍN 27. febrúar 2010 var eftirfarandi ályktun samþykkt:

„Aðalfundur Hins íslenska náttúrufræðifélags, haldinn 27. febrúar 2010 í Kópavogi, hvetur íslensk stjórnvöld og stjórnendur opinberra stofnana á sviði fræðslu, rannsókna og miðlunar til að standa vörð um útgáfu Náttúrufræðingsins, félagsrit Hins íslenska náttúrufræðifélags, og styðja með því móti við miðlun þekkingar og fróðleiks til landsmanna um umhverfismál og íslenska náttúru.

Náttúrufræðingurinn hefur verið gefinn út samfelld í rúma sjö áratugi frá árinu 1931. Um er að ræða alþýðlegt fræðslurit þar sem birtar eru greinar um náttúrufræði, jafnt fræðilegar greinar í bland við almennan fróðleik. Margar greinar í ritinu fjalla um rannsóknaniðurstöður á íslenskri náttúru sem eru hvergi birtar annars staðar. Leitast er við að gera efninu skil á aðgengilegan hátt þannig að áhugasamir leikmenn sem og fræðimenn geti haft bæði gagn og gaman af, þó án þess að slakað sé á í kröfum um gæði og áreiðanleika.

Hið íslenska náttúrufræðifélag bendir á að þrátt fyrir menningarlegt og fræðilegt mikilvægi Náttúrufræðingsins gerir smæð íslensks samfélags féluginu örðugt fyrir um að byggja upp stóran hóp meðlima. Stuðningur og þátttaka opinberra aðila getur því skipt sköpum í afkomu ritsins. Undanfarin misseri hefur borið á auknum úrsögnum opinberra bókasafna og skólastofnana úr félaginu. Í ljósi bágs efnahagsástands og kröfu yfirvalda um sparnað og niðurskurð er skiljanlegt að stjórnendur telji hag sinna stofnana gætt með slíkum ákvörðunum. Þó er hætt við að ávinningurinn verði að teljast léttvægur til lengri tíma lítið ef grafið er undan tilveru ritsins og útgáfan leggst af.

Þegar lítið er til þess óeigingjarna framlags sem stór hópur vísindamanna og fagaðila leggur af mörkum við útgáfu Náttúrufræðingsins og þeirrar sérstöðu sem ritið hefur í útgáfu á íslensku fræðsluefni um náttúrufræði verður að telja illskiljanlegt að þeir opinberu aðilar sem hafa skyldum að gegna varðandi fræðslu og miðlun náttúrufræða líti á uppsögn Náttúrufræðingsins sem sparnað.”

Hvað leynist undir Kötlu?

Fræðsluerindi HÍN mánudaginn 28. febrúar 2011 kl. 17:15

Næsta fræðsluerindi HÍN verður haldið **mánudaginn 28. febrúar 2011 kl. 17:15**. Dr. Bergrún Arna Óladóttir, jarðfræðingur hjá Norræna eldfjallasetrinu, Jarðvísindadeild Háskóla Íslands, flytur erindið og kallar hún það „*Hvað leynist undir Kötlu?*“

Staðbundið veður

Fræðsluerindi HÍN mánudaginn 28. mars 2011 kl. 17:15

Þriðja fræðsluerindi ársins verður haldið **mánudaginn 28. mars 2011 kl. 17:15**. Þá mun dr. Haraldur Ólafsson, veðurfræðingur við Háskóla Íslands og Veðurstofu Íslands, flytja erindi sem hann kallar „*Staðbundið veður*“.

Fræðsluerindi HÍN eru haldin í **stofu 132 í Öskju**, náttúrufræðahúsi Háskóla Íslands að Sturlugötu 7. Erindin hefjast **kl. 17:15** nema annað sé tekið fram.

Árgjald 2010 – ekki 2011!

Þau leiðu mistök urðu hjá þjónustubanka HÍN í sambandi við innheimtu á síðasta árgjaldi félagsins að bankinn auðkenndi greiðsluseðlana sem *Árgjald 2011* í stað *Árgjald 2010*. Með öðrum orðum, greiðsluseðillinn er vegna árgjalds fyrir árið 2010.

Félagsmenn eru beðnir velvirðingar á þessum mistökum.

Gera má ráð fyrir að árgjald ársins 2011 komi til innheimtu seinnihluta ársins í ár. Þá ættu félagsmenn að hafa í höndunum fjögur tölublöð af 81. árgangi Náttúrufræðingsins, sléttu 81 ári eftir að útgáfa tímaritsins hófst.